

PROŠLOST ZA BUDUĆNOST:

„ KONTRA MRAKU, KONTRA SILI! ”

Centar za demokratsku tranziciju (CDT) još jednom poziva na AKCIJU – ovaj put na akciju obilježavanja slavne prošlosti iz koje crpimo inspiraciju za borbe koje vodimo danas, kao i za borbe koje ostavljamo u nasljeđe onim koji dolaze nakon nas.

Sve antifašistkinje i antifašiste, kako iz Crne Gore, tako i sa prostora čitave Jugoslavije, one kojima je dosta istorijskog revizionizma, nacionalizma, klerikalizma i patrijarhata, koji su protiv granica među narodima i ljudima – pozivamo da nam se pridruže u borbi i u slavljenju partizanske borbe.

80 godina je prošlo od bitke na Neretvi, 80 godina je prošlo od bitke na Sutjesci, 80 godina je prošlo od drugog zasjedanja Antifašističkog vijeća narodnog oslobođenja Jugoslavije. Važni su to jubileji, važno je pamtiti i prisjećati ih se. Važno je obilježavati dane kada su se na ovim prostorima donosile odluke kojima se divila Evropa porobljena fašizmom.

Borba partizana i partizanki nije vođena samo za bunkere, za sela i gradove. Vodila se za slobodu, za ideale jednakosti i pravde. Vodila se za prava, ista ona koje nam danas žele oduzeti.

Zato ne smijemo dopustiti da se antifašizam svede na datume u kalendaru i na komemoracije, da se svede na položeni karanfil i prigodnu parolu kojoj ponekad i zaboravimo pravo značenje. Dužni smo uporno podsjećati da je ovdje postojalo stotine hiljada žena i muškaraca koji su znali razgrnuti mrak i zapaliti vatru antifašizma. Dužni smo tu vatru prenositi dalje, braniti prava i vrijednosti stečene u narodno-oslobodilačkoj borbi, a njihovu borbu koristiti kao nadahnuće za neke nove borbe.

Zato vas pozivamo da svaki dan zajedno zapalimo novi plamen, plamen nade – kontra mraku, kontra sili! Da maštamo pravednije društvo i da zajedno na njemu radimo.

Sa nama su i svi koji:

se protive reviziji istorijskih činjenica, koji odbacuju štetne narative čijim se širenjem stvaraju preduslovi za nove tenzije i sukobe na prostoru Jugoslavije;

ne pristaju na slavljenje ratnih zločinaca i saradnika fašista;

koji odbacuju retrogradne alternative idejama građanskog društva i tezu o nužnosti suživota između vjera i nacija – suživot ne može zamijeniti istinski zajednički život;

ne pristaju da se pod okriljem poštivanja vjerskih prava uređuju naši životi, da se rastače sekularno društvo i država;

se protive napadima na reproduktivna i radnička prava žena;

se protive ksenofobiji i žele pružiti podršku i pomoć svima koji su napustili svoje domove u potrazi za boljim i sigurnijim životom;

stoje solidarni sa svim nedovoljno plaćenim, izrabljivanim, decenijama učutkivanim radnicama i radnicima, te zahtijevaju plate koje omogućavaju dostojanstven život svima, a ne samo odabranoj eliti;

razumiju da bez bespoštedne borbe za LGBTIQ prava nema slobodnog društva;

vjeruju da svi građani i građanke moraju imati jednak pristup obrazovanju i zdravstvenoj zaštiti;

vjeruju da su aktivizam i rad za dobrobit zajednice, nužnost i ne pristaju da ćute pred nepravdom.

Pozivamo vas da zajedno promislimo kako bi antifašistička borba mogla ili trebala izgledati danas.

Pozivamo vas na AKCIJU: ako imate ideju za umjetničku intervenciju, protestno okupljanje, radionicu, javnu kampanju, javite nam se do **26. marta** na mail cdt@cdtmn.org kako bismo, u skladu sa mogućnostima, podržali ideju i uvrstili je u program aktivnosti. O programu odlučuje savjet našeg projekta koji čine antifašistkinje i antifašisti s prostora Jugoslavije.

AKCIJE NEMA

bez ZAJEDNIČKOG RADA

UKLJUČITE SE!